

Tuesday, July 14, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



CYMA SIR

Central YMA chuan Special Intensive Revision (SIR) 2026 draft roll-a mihring pun nasat lutukna hmunte en tha leh turin thuneitute an ngen dawn a; ECI lam pawh kalchilhin an thlen dawn.

Wawiin khan Central YMA chuan an Committee Room-ah thuthar thehdarhtute an kawm a; Central YMA hruaitute chuan SIR 2026 Draft Electoral Roll tihchhuah kha ngun takin an zir chiang a, Constituency thenkhatah SIR neih hnuhnung ber kum 2005-a Roll-a awmzat leh mihring pundan nena chhutin Enumeration Form thunluh (Digitisation) ah hian thil ni thei lo a awm nia an hriat thu leh, Mapping chungchangah hian dik hlel deuha thil tih a awm nia an hriat thu an sawi a, hemi chungchang hi thuneitute hnenah en tha leh tura ngenna thlen an tum thu an sawi.

Central YMA president Pu R Lalngheta chuan, SIR 2026 draft roll atanga a lan danin khawthlang lam ramri hnaih constituency-ah mihring an pung nasa lutuk chu an ngaih a that loh thu sawiin, entha leh tura thuneitute ngen an tum thu leh ECI ah pawh lamkal intirin a hmunah an zuk kalchilh dawn thu a sawi a; voter pun tam zualna hmuna SIR buaipuitu zingah thawk tha tawk lo an awm nia an hriat thu a sawi bawk.

Central YMA hruaitute chuan roll a la awm ngailote tana inthun luh dilna hun hawn mekah leh hearing neih hunah pawh khua leh tui dik takte chauh an luh theih nan hearing kal pui turin ERO leh AERO te an ngen a; hearing ah hian YMA Branch-

te leh NGO dangte pawh thahnemngai taka tel turin an ngen bakah, Political Party-
te pawh ngaihtuahna dang hmang lo turin an ngen nghal a ni.

(CORR Johnny)



SLAUGHTER HOUSE

AH&Vety department hnuaia sa talhna - Slaughter House pahnihah
chawhrualin thla tin ran 600 vel talh ziah ang a ni a; bawng talh an tam ber.

Vawiin khan State Veterinary Polyclinic Hospital Conference Hall, Khatlaah
AH&Vety department leh ICAR-NMRI, Hyderabad tangkawp chuan sa talhtute tan
thianghlim taka sa talh dan leh man man zawka hralh theih dan inzirtirna "One day
training on Hygenic meat production, meat safety and value addition technologies
for Development of North-Eastern India" an buatsaih a; veterinary officer Dr
Michael V Lalrinzuala chuan Aizawl khawpuia Slaughter House 2-ah thla tin ran
600 vel talh thin a nih thu a sawi.

*AH&Vety department Dr Michael V Lalrinzuala chuan Mualpuiah leh
Bawngkawn Brigade-ah Slaughter House an neih thu a sawi a, slaughter house
hmang tur hian sa talhtute chu an inziah luh a tul thu sawiin, tunah hian Mualpuiah
sa talhtu mi 48 leh Brigade ah mi 6 an inziak lut a, ni tin ran 20 vel bakah Inrinnia
zawrh turin Zirtawpni zanah ran 80 vel talh a ni thin, a ti a; bawng talh tam berin,
sial leh lawi pawh an talh thin thu leh vawk erawh chu an talh meuh loh thu a sawi.*

*Ran talhtu inziaklut turte chu TB an vei leh vei loh endik thin a nih thu leh TB
vei lote chiah ziah luh theih a nih thu te, rante pawh an hriselna dinhmun endikin, a
hrisel lo deuhthe chu Tuiriala sa leh a kaihhnawih bik bawlhhlawh paihna hmunah
an paih thin thute a sawi bawk.*

Training-ah hian Aizawla sa zuar leh ran talhtu mi 20 an tel a ni.

(CORR JOHNNY)



SAITUAL ASF

Tunlai hian Saitual district thenawm leh Saitual Town chhungah vawk pul hri
African Swine Fever (ASF) a leng mek a. Saitual District chhungah ASF hri hi a
darh zel loh nan District Magistrate chuan vawk khuahkhirhna thuchhuah a siam
nghal a ni.

Saitual Dist ah hian April thla avang khan ASF vangin vawk 101 a thi tawh ni a chhinchhiah a ni a, July thla bikah hian 43 an thi a, vawk 29 suat a ni tawh a ni.



INDIA CAMPAIGN

United Nations Security Council (UNSC) term 2028-29-a non-permanent member ni turin India chuan campaign beihpui a thlak tan a.

External Affairs Minister Dr S. Jaishankar chuan nizan khan New York UN Headquarter ah India in a chuh ve tur thu puangin khawvel pumah remna leh muanna, himna leh hmasawwna khairual a awm theihna tura India hmathlir SHANTI vision a tlangzarh a ni.

Dr. Jaishankar chuan UN peacekeeping mission 50 ah India ram chuan mi nuai 3 vel a thawh tih sawiin tunah hian mi 4300 vel an thawk mek a ti a, UN member state te thlawpna dilin Dr. Jaishankar chuan Security Council-ah India a tel chuan thutlukna siam kawngah te a thawhhlawk dawn niin a sawi.

India hi UN Secutiry Council Non Permanent member a lo ni tawh thin a, member a nih hnahnun ber chu kum 2021-22 khan a ni.

(Newsonair)

